

ИРГЭНИЙ НИСЭХИЙН ДҮРЭМ – 171

АГААРЫН НАВИГАЦИЙН ҮЙЛЧИЛГЭЭНИЙ ТЕХНИКИЙН
БАЙГУУЛЛАГА - ҮЙЛ АЖИЛЛАГАА БА ГЭРЧИЛГЭЭЖҮҮЛЭЛТ

А БҮЛЭГ. ЕРӨНХИЙ ЗҮЙЛ	2
171.1. Зорилго / Purpose	2
171.3. Тодорхойлолт / Definitions	2
171.5. Гэрчилгээжүүлэх шаардлага/ Requirement for certificate	3
171.7. Өргөдөл гаргах/ Application for certificate	4
171.9. Гэрчилгээг олгох/ Issue of certificate	4
171.11. Агаарын навигацйн үйлчилгээний төрөл	4
171.13. Гэрчилгээ эзэмшигчийн эрх	5
171.15. Гэрчилгээний хугацаа/ Duration of certificate	5
171.17. Гэрчилгээний хугацааг сунгах/ Renewal of certificate	6
171.19. Дүрмийн шаардлагаас чөлөөлөх	6
Б БҮЛЭГ. ГЭРЧИЛГЭЭЖҮҮЛЭЛТИЙН ШААРДЛАГУУД	6
171.51. Хүний нөөцөд тавигдах шаардлага/ Personnel requirements	6
171.53. Агаарын навигацйн үйлчилгээний байгууламжид тавигдах шаардлага	7
171.55. Аюулгүй байдлын хөтөлбөр/ Security programme	8
171.57. Бичиг баримтжуулалт/ Documentation.....	9
171.59. Хугацаат хэмжилт ба шалгалт тохируулга	9
171.61. Байгууламжийн ажиллагаа	10
171.63. Шалгалт тохируулга, хэмжилтийн төхөөрөмж	10
171.65. Байгууламжийн мэдээллийг зарлах	11
171.67. Осол, зөрчлийн дараа байгууламжийг шалгах.....	11
171.69. Байгууламжийн гэмтэл, дутагдал	11
171.71. Бүртгэл/ Records	12
171.73. Чанарын баталгаажуулалт	12
171.75. Холбооны журам.....	13
171.77. Аюулгүй ажиллагааны удирдлагын систем.....	13
171.79. Үйл ажиллагааны зааварт тавигдах шаардлага	14
В БҮЛЭГ. ҮЙЛ АЖИЛЛАГААНД ТАВИГДАХ ШААРДЛАГУУД	14
171.101. Гэрчилгээ эзэмшигчийн хүлээх үүрэг	14
171.103. Таних тэмдэг ба радио дуудлага	15
171.105. Техникийн ашиглалтын болон үйлчилгээний зааварчилгаа	15
171.107. Дүрмийн шаардлагаас гажих.....	15
171.109. Үйл ажиллагааны хязгаарлалт	16
171.111. Гэрчилгээ эзэмшигч байгууллагад өөрчлөлт хийгдэх	16

Зам, тээвэр, барилга, хот байгуулалтын сайдын
2010 оны 03 дугаар сарын 22-ны өдрийн
75 тоот тушаалын 1 дүгээр хавсралт

ИРГЭНИЙ НИСЭХИЙН ДҮРЭМ – 171

АГААРЫН НАВИГАЦИЙН ҮЙЛЧИЛГЭЭНИЙ ТЕХНИКИЙН БАЙГУУЛЛАГА - ҮЙЛ АЖИЛЛАГАА БА ГЭРЧИЛГЭЭЖҮҮЛЭЛТ

А БҮЛЭГ. ЕРӨНХИЙ ЗҮЙЛ

171.1. Зорилго / Purpose

(а) Энэ дүрмийн зорилго нь Иргэний нисэхийн салбарын хэмжээнд Агаарын навигацийн үйлчилгээ, түүний байгууламжуудын үйл ажиллагааны болон техникийн шаардлагуудыг тогтоох; мөн хэрэглэлийн нислэгийн дүрмээр (IFR) үйлдэх нислэгт болон Нислэгийн хөдөлгөөний үйлчилгээнд Агаарын навигацийн үйлчилгээг үзүүлэх техникийн байгууллагыг гэрчилгээжүүлэх, түүний үйл ажиллагааг зохицуулах журмуудыг тогтооход оршино.

171.3. Тодорхойлолт / Definitions

Аюулгүй ажиллагааны удирдлагын систем гэж үйлчилгээний аюулгүй ажиллагааны арга хэмжээг удирдах бодлого болон холбогдох журмуудыг тодорхойлох системийг;

Байгууламж гэж :

(а) тоног төхөөрөмж, түүний цахилгаан болон электроникийн хэлхээ, сувагчлал;

(б) газрын дамжуулах хэлхээ, хэрэгсэл зэрэг дэмжлэг үзүүлэх бүтцийг агуулсан суурин болон хөдөлгөөнт бүрэлдэхүүнийг;

Үйл ажиллагааны заавар гэж ИНД-171.79-д дурьдсан шаардагдах баримт бичгийг;

Газрын шалгалт тохируулга гэж холбоо, навигаци, ажиглалтын тоног төхөөрөмжүүдийн сигналын гаралт, тархалт, түүний параметрууд нь Иргэний нисэхийн олон улсын байгууллагаас тогтоосон стандарт, шаардлагыг хангаж байгаа эсэхийг эрх бүхий этгээд газрын станцад шалгаж, түүнд тохируулга хийхийг;

Нислэгийн хөдөлгөөн гэж агаарт болон аэродром дээр хөдөлгөөн үйлдэж байгаа бүх төрлийн агаарын хөлгийн хөдөлгөөнийг;

Техник үйлчилгээ гэж байгууламжид тавигдах техникийн шаардлагыг бататгах үүднээс хийгдэх бүх төрлийн засвар, өөрчлөлт, үзлэг, хуваарьт болон хуваарьт бус үйлчилгээг;

Техник үйлчилгээнээс гаргах гэж техник үйлчилгээнд хийгдсэн ажил нь батлагдсан өгөгдлүүд болон дүрэм, журмын дагуу чанартай хийгдэж, ашиглалтанд тэнцэх стандартад нийцүүлснийг эрх бүхий ажилтнаас баталгаажуулсан баталгаажуулалт;

Техник үйлчилгээний хөтөлбөр гэж байгууламжийн найдвартай ажиллагааг хангах зорилгоор хийгдэх хуваарьт техник үйлчилгээний ажлууд, түүнийг гүйцэтгэх үечлэл болон найдвартай ажиллагааны хөтөлбөр зэргийг тодотгосон техник үйлчилгээний баримт бичгийг;

Хуваарьт шалгалт гэж тухайн байгууламжид хэмжилтийн нарийн үйлдэл бүхий тоноглол ашиглан бүх өгөгдлийг нь шалгаж баримтжуулах нарийн мэргэжлийн инженерийн үзлэгийг;

Хуваарьт үзлэг гэж тухайн байгууламжид, хэмжилтийн энгийн төхөөрөмжүүдийг ашиглан өдөр, долоо хоног, сар, улирал тутам тогтмол хийж, баримтжуулах үзлэгийг;

Шалгалт гэж холбогдох хэмжилт, сорилт явуулах буюу загвараар шалган ажиглалт хийж, дүгнэлт гаргах замаар тохирлыг үнэлэхийг;

Шалгалтын нислэг гэж холбоо, навигаци, ажиглалтын тоног төхөөрөмжүүдийн сигналын гаралт, тархалт, түүний параметрууд стандарт, шаардлагыг хангаж байгаа эсэхийг шалгаж буй цогцолбор нислэгийг;

Шалгалт тохируулга гэж холбоо, навигаци, ажиглалтын тоног төхөөрөмжүүдийн сигналын гаралт, тархалт, түүний параметрууд нь стандарт, шаардлагыг хангаж байгаа эсэхийг Шалгалтын нислэгээр, эсхүл газрын станцад шалгаж, түүнд тохируулга хийхийг.

171.5. Гэрчилгээжүүлэх шаардлага/ Requirement for certificate

(а) Энэ дүрмийн дагуу гэрчилгээжсэн байгууллага болон аливаа этгээд нь энэ зүйлийн (б), (в) хэсэгт зааснаас бусад тохиолдолд агаарын навигацийн үйлчилгээний байгууламжийг ажиллуулахыг хориглоно.

(б) Гэрчилгээ эзэмшээгүй аливаа этгээд нь нисэхийн радио давтамжинд ажилладаг дараах нөхцөл шаардлагыг хангасан байгууламжийг ажиллуулж болно:

1/ тухайн байгууламж нь ашиглалтын хувьд:

- 1.1. нислэгийн хөдөлгөөний үйлчилгээнд ашиглагдахгүй радио холбооны дамжуулагч бол;
- 1.2. хэрэглэлийн нислэгийн дүрмээр (IFR) үйлдэх нислэг, эсхүл нислэгийн хөдөлгөөний үйлчилгээнд ашиглагдахгүй радио навигацийн байгууламж бол;

2/ тухайн байгууламж нь стандарт, шаардлагуудын хувьд:

- 2.1. Чикагогийн конвенцийн Хавсралт 10, 3 дугаар боть, 2 дугаар хэсэг, 2 дугаар бүлэг эсхүл Хавсралт 10, 1 дүгээр боть, 3 дугаар бүлэгт заасан систем тодорхойлолтуудыг хангасан бол;
- 2.2. Чикагогийн конвенцийн Хавсралт 10, 2-р ботид заасан холбооны журмуудаар тогтоосон шаардлагыг хангасан бол ;

3/ тухайн байгууламж нь агаарын навигацийн бусад үйлчилгээ болон байгууламжийн үйл ажиллагаанд нөлөөлдөггүй бол;

4/ тухайн байгууламжид эрх бүхий байгууллагаас дараах зөвшөөрлийг олгосон бол:

- 4.1. радио давтамжийн асуудал эрхэлсэн эрх бүхий байгууллагаас олгосон тухайн байгууламжийг ажиллуулах давтамжийн зөвшөөрөл;
- 4.2. энэхүү дүрмийн 171.103-т заасны дагуу авсан тухайн байгууламжийн таних тэмдэг болон радио дуудлага.

(в) Энэ дүрмийн дагуу гэрчилгээ эзэмшээгүй аливаа этгээд нь нисэхийн радио давтамжинд ажилладаг газрын хөдөлгөөнт радио дамжуулагчийг дараах шаардлагыг хангасан нөхцөлд ажиллуулж болно:

- 1/ тухайн радио дамжуулагч нь нислэгийн хөдөлгөөний үйлчилгээнд ашиглагдахгүй;
- 2/ тухайн радио дамжуулагч нь Чикагогийн конвенцийн Хавсралт 10, 2 дугаар ботид заасан холбооны журмуудын шаардлагуудыг хангасан;
- 3/ радио дамжуулалт нь агаарын навигацийн бусад үйлчилгээ болон байгууламжийн үйл ажиллагаанд нөлөөлдөггүй;
- 4/ радио давтамжийн асуудал эрхэлсэн эрх бүхий байгууллагаас радио давтамжийн зөвшөөрөл авсан бол.

171.7. Өргөдөл гаргах/ Application for certificate

(а) Агаарын навигацийн үйлчилгээний техникийн байгууллагын гэрчилгээг эзэмшихээр өргөдөл гаргагч /цаашид “өргөдөл гаргагч” гэх/ нь ИНЕГ-171/01 маягыг бөглөж, дараах бичиг баримтуудын хамтаар ИНЕГ-ын даргад ирүүлнэ:

- 1/ энэ дүрмийн 171.79-д заасан өргөдөл гаргагчийн Үйл ажиллагааны заавар;
- 2/ шаардлагатай тохиолдолд төлбөрийн баримт.

171.9. Гэрчилгээг олгох/ Issue of certificate

(а) ИНЕГ-ын дарга нь өргөдөл гаргагч дараах шаардлагыг хангасан тохиолдолд түүнд агаарын навигацийн үйлчилгээний техникийн байгууллагын гэрчилгээг олгоно:

- 1/ өргөдөл гаргагч нь энэ дүрмийн Б бүлэгт заасан шаардлагыг хангасан;
- 2/ өргөдөл гаргагч, түүний удирдах албан тушаалтнууд нь энэ дүрмийн 171.51 (а) 1/ болон 2/-т заасан шаардлагад нийцсэн;
- 3/ гэрчилгээ олгосноор иргэний нисэхийн аюулгүй ажиллагаанд сөргөөр нөлөөлөхгүй гэж үзэж байгаа бол;

171.11. Агаарын навигацийн үйлчилгээний төрөл

(а) Агаарын навигацийн үйлчилгээний техникийн байгууллагын гэрчилгээнд эрхлэх Агаарын навигацийн үйлчилгээний төрөл, тухайн төрлийн үйлчилгээг эрхлэхэд тавигдах шаардлагыг тусгасан байх ба үйлчилгээний төрлийг дараах ангиллаар тогтооно:

- 1/ нисэхийн мэдээллийг нэвтрүүлэх үйлчилгээ:
 - 1.1. нислэг үйлдэж буй агаарын хөлөгт өгөх цаг агаарын мэдээ (VOLMET);
 - 1.2. мэдээллийн автомат систем (ATIS).
- 2/ нисэхийн суурин холбооны үйлчилгээ:
 - 2.1. нислэгийн хөдөлгөөний үйлчилгээний шууд ярианы хэлхээ;
 - 2.2. нисэхийн суурин холбооны сүлжээ (AFTN);
 - 2.3. төв хоорондын холбоо (ICC);
 - 2.4. ICAO-гийн өгөгдөл харилцан солилцох ерөнхий сүлжээ (CIDIN);
 - 2.5. нислэгийн хөдөлгөөний үйлчилгээний өгөгдөл дамжуулах үйлчилгээ (ATS message handling);
 - 2.6. цаг уурын мэдээллийн цахилгаан холбооны сүлжээ.
- 3/ нисэхийн хөдөлгөөнт холбооны үйлчилгээ:
 - 3.1 богино долгионы агаар-газар холбоо(HF);
 - 3.2 хэт богино долгионы агаар-газар холбоо(VHF);

- 3.3 ультра богино долгионы агаар-газар холбоо(UHF);
- 3.4 агаар-газар өгөгдлийг солилцогч.

4/ нисэхийн радио навигацийн үйлчилгээ:

- 4.1. хэрэглэлээр буулт үйлдэх систем (ILS);
- 4.2. буулт үйлдэх хэт богино долгионы систем (MLS);
- 4.3. бүх чиглэлтэй хэт өндөр давтамжийн радио дохиологч (VOR);
- 4.4. чиглүүлэх радио нэвтрүүлэгч (NDB);
- 4.5. зай хэмжих төхөөрөмж (DME);
- 4.6. маркерын радио нэвтрүүлэгч (Marker radio beacon);
- 4.7. нарийвчлалтай ойртолтын радиолокатор (PAR);
- 4.8. ажиглалтын хоёрдогч радиолокатор (SSR);
- 4.9. автоматаар чиглэл тогтоогч (ADF)
- 4.10. ил харааны ойртолтын налуу заагч систем (PAPI);
- 4.11. гэрэл суултын систем (AFL).

5/ нисэхийн ажиглалтын үйлчилгээ:

- 5.1. ажиглалтын анхдагч радиолокатор;
- 5.2. ажиглалтын хоёрдогч радиолокатор;
- 5.3. автомат хамааралтай ажиглалтын систем(ADS);
- 5.4. тооцоот ажиглалтын систем(Multilateration).

6/ Монгол Улсын агаарын навигацийн системийн үйл ажиллагаанд дэмжлэг үзүүлэх бусад үйлчилгээ:

- 6.1. цахилгаан хангалтын үндсэн болон бэлтгэл үүсгүүр.

171.13. Гэрчилгээ эзэмшигчийн эрх

(а) Гэрчилгээ эзэмшигч нь Хэрэглэлийн нислэгийн дүрмээр үйлдэх нислэгт болон нислэгийн хөдөлгөөнд Агаарын навигацийн холбоо, навигаци, ажиглалтын үйлчилгээг Гэрчилгээнд тусгагдсаны үзүүлэх эрхтэй.

(б) Энэ дүрмийн 171.109 зүйлд хамааралтайгаар Агаарын навигацийн үйлчилгээний техникийн байгууллагын гэрчилгээ эзэмшигч (цаашид Гэрчилгээ эзэмшигч гэх) нь гэрчилгээний дагуу дараах байгууламжуудыг ажиллуулж болно:

- 1/ гэрчилгээ эзэмшигчийн Үйл ажиллагааны зааварт тусгагдсан бол;
- 2/ хэрэв байгууламж нь Үйл ажиллагааны зааварт тусгагдаагүй бол энэ дүрмийн 171.53-д заасны дагуу түүний ажиллагаанд хяналт тавьж, техникийн туршилт, шалгалт хийж байгаа бол;

171.15. Гэрчилгээний хугацаа/ Duration of certificate

(а) Гэрчилгээг 3 хүртэлх жилийн хугацаагаар олгох бөгөөд мөн 3 хүртэлх жилийн хугацаагаар сунгаж болно.

(б) Гэрчилгээ нь түүний хүчинтэй хугацаа дуусах, ИНЕГ-аас түдгэлзүүлэх болон хүчингүй болгосноос бусад тохиолдолд хүчин төгөлдөр байна.

(в) Гэрчилгээний хугацаа дууссан, эсхүл хүчингүй болгосон тохиолдолд эзэмшигч нь гэрчилгээг ИНЕГ-т нэн даруй эргүүлж өгнө.

(г) Гэрчилгээний үйлчлэлийг түр түдгэлзүүлсэн тохиолдолд гэрчилгээ эзэмшигч нь ИНЕГ-ын даргад холбогдох баталгааг гарган өгч, гэрчилгээний эрхийг сэргээлгэх хүсэлтээ тавьж болно.

171.17. Гэрчилгээний хугацааг сунгах/ Renewal of certificate

(а) Гэрчилгээ эзэмшигч нь гэрчилгээний хүчинтэй хугацаа дуусахаас 30 хоногийн өмнө гэрчилгээг сунгуулах өргөдлийг ИНЕГ-171/01 маягтын дагуу гаргаж, төлбөрийн баримтын хамт ИНЕГ-ын даргад ирүүлнэ.

(б) Гэрчилгээ эзэмшигч гэрчилгээнд заагдсан үйл ажиллагаа, үйлчилгээг хэвийн үргэлжлүүлэх шаардлагыг хангасан тохиолдолд ИНЕГ-ын дарга гэрчилгээг энэ дүрмийн 171.15-ын (а)-д заасан хугацаагаар сунгана.

171.19. Дүрмийн шаардлагаас чөлөөлөх

(а) ИНЕГ-ын дарга нь иргэний нисэхийн аюулгүй ажиллагааны шаардлагыг хангасан нөхцөлд ИНД-11-ийн холбогдох заалтыг үндэслэн, гэрчилгээ эзэмшигчийг энэ дүрмийн зарим шаардлагаас чөлөөлж болно.

Б БҮЛЭГ. ГЭРЧИЛГЭЭЖҮҮЛЭЛТИЙН ШААРДЛАГУУД

171.51. Хүний нөөцөд тавигдах шаардлага/ Personnel requirements

(а) Агаарын навигацийн үйлчилгээний техникийн байгууллагын гэрчилгээ эзэмшихээр өргөдөл гаргагч нь дараах албан тушаалтан, ажилтантай байна:

- 1/ байгууллагын бүх үйл ажиллагаа нь энэ дүрмийн шаардлагад нийцэж, санхүүжигдэж байгааг бататгах, хяналт тавих, энэхүү бүлэгт заасан шаардлагуудыг биелүүлж, хариуцлага хүлээх эрх бүхий удирдах албан тушаалтан;
- 2/ байгууллага, түүний нэгж, салбаруудын үйл ажиллагаа энэ дүрмээр тогтоосон шаардлагуудыг хангаж байгааг бататгах, хянах үүрэг хүлээсэн энэ зүйлийн (а) 1/-т заасан удирдах албан тушаалтанд шууд захирагдах албан тушаалтнууд;
- 3/ өргөдөл гаргагчийн Үйл ажиллагааны зааварт тусгагдсан байгууламжуудын ажиллагааг шалгах, хянах, ажиллуулахад мэргэшсэн эрх, үүрэг бүхий бэлтгэгдсэн ажилтнууд.

(б) Өргөдөл гаргагч нь байгууллагын сургалтын бодлогыг тодорхойлж, сургалтын хөтөлбөрийг боловсруулж мөрдөх ба ажилтнуудын сургалт, дадлагажуулалт, ур чадварын бүртгэлийн сантай байна.

(в) Өргөдөл гаргагч нь сургалтын үйл ажиллагааг ICAO-гийн Doc 7192-ын AN/857-ын E-2 хэсэг болон Doc 9683 заавруудын дагуу зохион байгуулна.

(г) Өргөдөл гаргагч нь дараах журмуудыг боловсруулж ажилтнуудын эрх, үүргийг бичгээр баталгаажуулсан байна:

- 1/ мэргэжлийн ур чадварыг үнэлэх;
- 2/ мэргэжлийн ур чадварыг хадгалах, дээшлүүлэх, мэргэжлийн үнэмлэх олгох;

171.53. Агаарын навигацийн үйлчилгээний байгууламжид тавигдах шаардлага

(а) Өргөдөл гаргагч нь дараах шаардлагыг хангахуйц баталгаажуулсан журмыг тогтоосон байна:

1/үйл ажиллагааны зааварт тусгагдсан байгууламж нь:

- 1.1. техникийн ашиглалтын шаардагдах үзүүлэлтийг хангасан маяг, загвар, суурилуулалттай байх ба зохих шаардлагыг хангасан тохиолдолд түүнийг ашиглалтанд хүлээн авна;
- 1.2. Чикагогийн конвенцийн Хавсралт 10-ын I, III, IV-р боть болон Хавсралт 14-ийн I-р ботид заасан стандарт, шаардлага, системийн холбогдох үзүүлэлтийг бүрэн хангасан байна;
- 1.3. 171.103 дугаар зүйлд дурьдсан таних тэмдэг, радио дуудлага авсан байна;
- 1.4. байгууламжийн ажиллах радио давтамж нь Чикагогийн конвенцийн Хавсралт 10-ын V Хэсэгт заасан шаардлагыг хангахаас гадна ИНЕГ-ын радио давтамжийг хуваарилах, хамгаалах бодлоготой нийцсэн байх ба харилцаа холбооны асуудал эрхэлсэн төрийн захиргааны байгууллагаас радио давтамжийн зөвшөөрлийг авсан байна.

2/ Үйл ажиллагааны зааврын дагуу аэродромд ойртолт, хөөрөлт ба буулт үйлдэхэд ашиглагддаг радио навигацийн үйлчилгээний байгууламжийн ажиллагааны мэдээллийг дараах газруудад хүргэдэг байна:

- 2.1. аэродромын нислэгийн хөдөлгөөний удирдлагын төвд;
- 2.2. ойртолтын нислэгийн хөдөлгөөний удирдлагын төвд.

3/ Үйл ажиллагааны зааврын дагуу ажиллуулах байгууламж бүрийг нисэхийн радио навигацийн үйлчилгээ болон нислэгийн хөдөлгөөний удирдлагын үйлчилгээний шаардлагад нийцсэн, тасралтгүй ажиллагааг хангах цахилгаан тэжээлийн зохих эх үүсвэртэйгээр суурилагдсан байна;

4/ байгууламжийн ажиллагаанд саад учруулах, эвдлэн сүйтгэх зэргээс үүсэх эрсдэлийг хамгийн бага байлгахын тулд энэ дүрмийн 171.55 дугаар зүйлд заасанчлан Аюулгүй байдлын хөтөлбөрт тусгагдсанаар суурилагдсан байна;

5/ Үйл ажиллагааны зааварт заасан байгууламж бүрийн байрлалын онцгой бүсийг:

- 5.1. тухайн байгууламжийн байрлалын зурагт тодорхой тэмдэглэгдсэн байна;
- 5.2. тухайн байрлалд зохих тэмдэг, тэмдэглэгээг хийж, хамгаалагдсан байна;
- 5.3. байрлалын хязгаарлалтын бүсэд аливаа барилга, хашааг барих, тээврийн хэрэгсэл болон агаарын хөлгөөр дайрч сүйтгэх зэргээс сэргийлж тухайн газар, объектыг эзэмшигч, аэродромын үйл ажиллагааг эрхлэгч, нислэгийн хөдөлгөөний үйлчилгээний төвтэй бичгээр гэрээг байгуулж хамгаалсан байна.

(б) Үйл ажиллагааны зааварт заагдсан Агаарын навигацийн үйлчилгээний байгууламжууд нь дараах нэмэлт үзүүлэлт, шаардлагыг хангасан байна:

1/ өргөдөл гаргагчийн Үйл ажиллагааны зааварт заагдсан радио навигацийн байгууламж бүр нь хяналтын системтэй байх ба дараах нөхцөл байдал үүссэн тохиолдолд тухайн төхөөрөмжийн ажиллагааг үйлчилгээнээс тусгаарлаж, холбогдох удирдлага хяналтын цэг рүү анхааруулах мэдээллийг дамжуулдаг байна:

- 1.1. тухайн төхөөрөмжийн хангаж байгаа навигацийн мэдээлэл нь зөвшөөрөгдсөн нарийвчлалын хэмжээнээс гадна буюу хэтэрсэн;
- 1.2. таних тэмдгийн (ID) дамжуулалтад алдаа заасан;
- 1.3. хяналтын системд гэмтэл, саатал үүссэн.

- 2/ цахилгаан тэжээлийн үндсэн болон бэлтгэл үүсгүүр нь Чикагогийн конвенцийн Хавсралт 14-ын I боть, 8 дугаар бүлэгт заасан стандарт, шаардлагаас гадна дараах шаардлагыг хангасан байна:
- 2.1. радио навигацийн байгууламжуудын цахилгаан тэжээлийн сэлгэн залгалтын хугацаа нь аэродромын зэрэглэлээс хамаарах ба нисэх буудлуудад байрладаггүй бие даасан радионавигацийн байгууламжуудын цахилгаан тэжээлийн сэлгэн залгалтын хугацаа нь Чикагогийн конвенцийн Хавсралт 10-ын I боть, Хавсралт C-гийн 8.1-т заагдсан шаардлага хангасан;
 - 2.2. хэрэв цахилгаан хангамжийн бэлтгэл үүсгүүр автоматаар холбогддоггүй бол, шаардлагатай үед аль болох хурдан шилжүүлэн залгах аргачлалыг тодорхойлсон байх.

(в) Өргөдөл гаргагч нь байгууламжийг туршилт хийх зорилгоор түр ажиллуулах бол дараах шаардлагыг бататгасан журмыг боловсруулж мөрдөнө:

- 1/ түр ажиллуулж буй байгууламжийн ажиллагаа нь нислэгийн хөдөлгөөний үйлчилгээнд ашиглагдаж байгаа бусад байгууламжийн ажиллагаанд нөлөөлөхөөргүй байх;
- 2/ түр ажиллуулж буй байгууламжийн ажиллагааны холбогдолтой мэдээллийг нисэхийн мэдээллийн үйлчилгээний байгууллага (AIS)-д дамжуулж NOTAM мэдээгээр зарлуулсан байх ба хэрэв шаардлагатай бол Нисэхийн мэдээллийн эмхэтгэл /AIP/-д хэвлүүлсэн байх;
- 3/ байгууламжид туршилт, техникийн шалгалтыг хийхийн өмнө хор хөнөөл учруулахуйц сөрөг нөлөөллөөс урьдчилан сэргийлэх арга хэмжээг авсан байх.

(г) Агаарын навигацийн үйлчилгээний байгууламж нь ИНЕГ-ын даргаас баталгаажуулсан гэрчилгээжүүлэх журмын дагуу ашиглалтанд тэнцэхийг нотолсон гэрчилгээ авсан байна.

(д) Агаарын навигацийн үйлчилгээний байгууламжийг зөвхөн ашиглалтанд тэнцэх гэрчилгээ олгогдсоны дараа агаарын навигацийн үйлчилгээнд ашиглана.

(е) Өргөдөл гаргагч нь Үйл ажиллагааны зааварт заагдсан байгууламжийн техник үйлчилгээ, засварт ашиглагдах сэлбэгийн хангалтын талаар дараах үйл ажиллагааг зохицуулах журмыг боловсруулж мөрдөнө.

- 1/ байгууламжийн хэвийн ажиллагааг хангах зорилгоор байгууламж тус бүрд шаардлагатай сэлбэг хэрэгслийн жагсаалтыг эрх бүхий ажилтнаар гаргуулах, хянуулах, батлуулах болон сэлбэгийн жагсаалтын дагуу сэлбэгийг захиалах, худалдан авах түүнд хяналт тавих;
- 2/ худалдан авахаас өмнө бүрэн гүйцэд үзлэг хийх боломжгүй эд анги, сэлбэг хэрэгслүүд нь чанарын шаардлага хангаж буй эсэхийг бататгах аргачлалыг тодорхойлсон байх;
- 3/ байгууламжийн сэлбэг хэрэгслийг хүлээн авах, тэдгээрийн хадгалалт, хаяглалт зэрэгт тавигдах шаардлагуудыг нарийвчлан тогтоосон байх;
- 4/ байгууламжийн сэлбэг хэрэгслийн бүртгэл, тэдгээрийн олголт, сэлбэг хэрэгслийн зарцуулалтын тайлан тооцоог гаргах аргачлалыг заасан байх;

171.55. Аюулгүй байдлын хөтөлбөр/ Security programme

(а) Өргөдөл гаргагч нь Үйл ажиллагааны заавартаа тусгагдсан байгууламжуудыг хөндлөнгийн хууль бус үйлдлээс хамгаалахад чиглэсэн аюулгүй байдлын хөтөлбөртэй байна.

(б) Аюулгүй байдлын хөтөлбөрт, байгууламжуудын ажиллагаанд саад учруулах, эвдлэн сүйтгэх зэргээс үүсэх эрсдлийг хамгийн бага байлгахад чиглэсэн дараах аюулгүй байдлын шаардлага, түүнийг биелүүлэх үйл ажиллагааг тусгасан байна.

- 1/ өргөдөл гаргагчийн Үйл ажиллагааны зааварт заагдсан агаарын навигацийн барилга, байгууламжийг Иргэний нисэхийн аюулгүй байдлын үндэсний хөтөлбөрийн 6-р зүйлд заасны дагуу хамгаалагдсан бүсэд байрлуулах ба нисэх буудлуудад байрладаггүй бие даасан радионавигацийн байгууламжуудыг нь хамгаалалтын бүстэй байх;
- 2/ байгууламжийг суурьлуулсан барилга нь аливаа халдлага, саад учруулах ажиллагааг шуурхай илрүүлэх хяналтын системтэй байх, эсхүл Монгол улсын Гэрээт харуул хамгаалалтын тухай хуулийн дагуу зөвшөөрөл авсан харуул хамгаалалтын байгууллагаар хамгаалуулсан байх;
- 3/ байгууламжид хөндлөнгийн хууль бус үйлдэл, халдлага гарсан тохиолдолд ажилтнуудын ажиллах журмыг тогтоож мөрдөх;

(в) Аюулгүй байдлын холбогдолтой аливаа зөрчлийг ИНД-12-т заасны дагуу мэдээлэх, ИНЕГ-т илтгэж байх.

171.57. Бичиг баримтжуулалт/ Documentation.

(а) Өргөдөл гаргагч нь Үйл ажиллагааны заавартаа тусгасан байгууламжуудын ажиллагаанд шаардлагатай техникийн баримт бичиг, ашиглалтын болон, засвар үйлчилгээний заавар, техникийн стандартууд, холбогдох бусад бичиг баримттай байна.

(б) Өргөдөл гаргагч нь энэ зүйлийн (а)-д заагдсан бичиг баримтуудыг хянах журамтай байх ба уг журам нь дараах шаардлагуудыг хангасан байна:

- 1/ бүх бичиг баримтыг ашиглахаас өмнө 171.51-д заагдсан эрх бүхий албан тушаалтан хянаж, зөвшөөрсөн байх;
- 2/ байгууламжийн ажиллагаа, ашиглалтанд шаардлагатай холбогдох бичиг баримтыг хянаж, зөвшөөрөгдсөн хувийг тухайн ажлын байранд ажиллах хүмүүс авч бүрэн ашиглах боломжтой байх;
- 3/ хүчингүй болсон бичиг баримтыг ажлын байр болон хэрэгцээнээс нэн даруй гаргаж мөрдүүлэхгүй байх;
- 4/ бичиг баримтад оруулж байгаа нэмэлт өөрчлөлтүүдийг энэ дүрмийн 171.51 зүйлд заасан эрх бүхий албан тушаалтан хянаж, зөвшөөрсөн байх.

171.59. Хугацаат хэмжилт ба шалгалт тохируулга

(а) Өргөдөл гаргагч нь Үйл ажиллагааны зааварт заагдсан байгууламжуудын хэвийн ажиллагааны зохих шаардлага, техникийн үзүүлэлтүүдийг хангаж бататгах, хуваарьт техникийн хэмжилт, шалгалт тохиргоо хийх ажлыг зохицуулсан журамтай байх ба энэ журам нь дараах зүйлийг агуулсан байна:

- 1/ байгууламжийн газрын шалгалт тохиргоо, хэмжилт болон шаардлагатай бол хийгдэх нислэгээр гүйцэтгэх шалгалт тохируулга;
- 2/ байгууламжид дараах мэдээллүүдийг үндэслэн гүйцэтгэх хуваарьт шалгалт, хэмжилтийн давтамжийг тогтоох, өөрчлөх шалгуурууд;
 - 2.1 ICAO-гоос гаргасан холбогдох мэдээлэл;
 - 2.2 тухайн байгууламжийн найдвартай ажиллагааны холбогдох өгөгдөлүүд;
 - 2.3 тухайн байгууламжийн эсхүл ижил төрлийн байгууламжийн найдвартай ажиллагааны шалгагдсан мэдээлэл, тухайн байгууламжийн ажиллах орчны тогтвортой байдал.

- 3/ тухайн байгууламжийн хуваарьт шалгалт тохиргоо, хэмжилтийн давтамжийг тогтоох ба өөрчлөх үндэслэлийг баримтжуулсан байх;
- 4/ хэмжилтийг зөвхөн энэ дүрмийн 171.51-д заасан этгээд гүйцэтгэх;
- 5/ шалгалт тохиргоог тухайн байгууламжийн шалгалт тохиргоог хийх сургалтанд хамрагдаж, эрх авсан этгээд гүйцэтгэх.

(б) Өргөдөл гаргагч нь байгууламжийн техник ашиглалтын дараах хөтөлбөрүүдийг боловсруулж, үйл ажиллагаандаа хэрэгжүүлнэ:

- 1/ үйл ажиллагааны зааварт заагдсан байгууламж бүрт хийх хуваарьт Газрын шалгалт тохиргооны хөтөлбөр;
- 2/ үйл ажиллагааны зааварт заагдсан байгууламж бүрт тогтмол хуваарийн дагуу хийгдэх Техникийн хэмжилтийн хөтөлбөр;
- 3/ үйл ажиллагааны зааварт заагдсан байгууламж бүрт хийх хуваарьт Шалгалтын нислэгийн хөтөлбөр.

(в) Энэ зүйлийн (б)-гийн 2/ ба 3/-т дурьдсан, тогтмол хуваарийн дагуу хийгдэх техникийн хэмжилтийн хөтөлбөр ба Шалгалтын нислэгийн хөтөлбөр нь энэ зүйлийн (а)-гийн 2/-т заасан шалгуурт үндэслэх бөгөөд байгууламжийн шалгалт тохиргоо болон хэмжилт хоорондын хамгийн их хугацааг тодорхойлсон байна.

(г) Өргөдөл гаргагч нь ИНЕГ-ын даргад хуваарьт Шалгалтын нислэг хийх шаардлагагүй радио навигацийн төхөөрөмжийн талаар мэдэгдэнэ.

(д) ИНЕГ-ын дарга нь Шалгалтын нислэгт тавигдах шаардлагыг тогтооно.

(е) Өргөдөл гаргагч нь энэ зүйлийн (д)-д заасан шаардлагыг хангасан шалгалтын нислэгийг гүйцэтгэх эрх бүхий гадаадын болон дотоодын байгууллагаар Шалгалтын нислэгийг гүйцэтгүүлнэ.

(ж) Чикагогийн конвенцийн Хавсралт 10-ын I Хэсэг, 3 дугаар бүлэгт заагдсан радио навигацийн төхөөрөмжүүдэд хугацаат газрын болон шалгалтын нислэгийн шалгалт тохируулгыг заавал хийнэ.

171.61. Байгууламжийн ажиллагаа

(а) Өргөдөл гаргагч нь дараах шаардлагыг хангаагүй нөхцөлд Үйл ажиллагааны заавартаа заагдсан байгууламжуудыг ажиллуулахгүй бөгөөд энэ талаар мөрдөх журмыг боловсруулан гаргасан байна:

- 1/ байгууламжийг ажиллуулах этгээд нь зохих зөвшөөрөлтэй, энэ дүрмийн 171.51-ийн (г)-д заасны дагуу ур чадвараа үнэлүүлсэн байх;
- 2/ энэ дүрмийн 171.105-р зүйлд заасны дагуу тухайн байгууламжийн ажиллах чадварыг бататгах техникийн үзлэг, шалгалтыг хийсэн байх;
- 3/ байгууламжийн талаарх мэдээллийн бүртгэл нь энэ дүрмийн 171.71 зүйлд заасан журмын дагуу хийгдсэн байх.

171.63. Шалгалт тохируулга, хэмжилтийн төхөөрөмж

(а) Өргөдөл гаргагч нь Үйл ажиллагааны заавартаа заагдсан байгууламж бүрийн ашиглалтыг хариуцсан нэгжийг шаардлагатай шалгалт тохиргоо, хэмжилтийн төхөөрөмж, багажаар хангасан байна.

(б) Өргөдөл гаргагч нь хэмжилт, шалгалтыг гүйцэтгэхэд шаардлагатай төхөөрөмжийн нарийвчлалыг баталгаажуулах зорилгоор энэ зүйлийн (а)-д заагдсан бүх шалгалт тохиргоо, хэмжилтэд ашиглагдах төхөөрөмжүүдийн хяналт, тохируулга болон ашиглалтын үйл ажиллагааг тусгасан журмыг боловсруулж мөрдөнө.

(в) Энэ зүйлийн (б)-д заасан журмаар байгууламжийн ажиллагааны чухал өгөгдлүүдийг хэмжих төхөөрөмжүүд нь дараах шаардлагыг хангасан байна.

- 1/ ашиглахаас өмнө эсхүл тогтмол хуваарийн дагуу зохих стандартад нийцүүлэн тохируулга хийгдсэн байна. Хэрэв тийм стандарт байдаггүй бол тохируулга хийсэн үндэслэлийг баримтжуулж, энэ дүрмийн 171.71 зүйлд заасан журмын дагуу тайлан, бүртгэл үйлдэж хадгална;
- 2/ шалгах төхөөрөмж бүр өөрийн тохируулгыг үзүүлэх индикатортай байх;
- 3/ шалгалт тохиргоо, хэмжилтийн төхөөрөмжид дараах хяналтыг байнга тавьж байна:
 - 3.1 тохируулгыг нь алдагдуулахгүй байхаар хамгаалан, тоногдсон байх;
 - 3.2 ашиглах, зөөх, хадгалж хамгаалах явцад нарийвчлал нь өөрчлөгдөхгүй байх.

(г) Хэрэв өөр байгууллагын шалгалт тохиргоо, хэмжилтийн төхөөрөмжийг ашиглан байгууламжийн техникийн ажиллагааны хэмжилтийг гүйцэтгэх бол тухайн төхөөрөмж нь энэ зүйлийн (в)-д заасан шаардлагуудыг хангасан байна.

171.65. Байгууламжийн мэдээллийг зарлах

(а) Өргөдөл гаргагч нь Үйл ажиллагааны заавартаа заагдсан байгууламжийн техникийн ажиллагаа, түүний өөрчлөлт зэргийг хэрэглэгч, Нисэхийн мэдээллийн үйлчилгээний байгууллагад мэдэгдэж байх журмыг боловсруулж мөрдөх ба энэ журамд дараах зүйлийг тусгасан байна:

- 1/ агаарын навигацийн үйлчилгээний байгууламжийн ажиллагааны мэдээллийг Нисэхийн мэдээллийн үйлчилгээний байгууллагад дамжуулах;
- 2/ агаарын навигацийн үйлчилгээний байгууламжийн ажиллагааны аливаа өөрчлөлтийн талаарх мэдээллийг NOTAM мэдээгээр зарлуулсан байх;
- 3/ мэдээллийн үнэн зөвд хариуцлага хүлээх, мэдээлэлд баталгаа өгөх албан тушаалтнуудыг тодорхойлсон байх.
- 4/ шаардлагатай бол AIP-д хэвлэгдсэн мэдээллийн үнэн зөвийг шалгаж байх.

171.67. Осол, зөрчлийн дараа байгууламжийг шалгах

(а) Өргөдөл гаргагч нь осол, зөрчилд өртсөн агаарын хөлөг ашиглаж байсан, эсхүл тухайн үед нислэгийн хөдөлгөөний үйлчилгээнд ашиглагдаж байсан байгууламжийн ажиллагааны байдлыг шалгах, үнэн зөв бүртгэлийг хийх журмыг боловсруулж мөрдөх ба энэ журмаар дараах үйл ажиллагааг зохицуулж байна:

- 1/ гэрчилгээ эзэмшигчид осол, зөрчлийн талаар мэдэгдэл ирсэн тохиолдолд байгууламжийн ажиллагааны байдлыг нэн даруй шалгах;
- 2/ дээрх байгууламжийн ажиллагааны шалгалтын бүртгэл, тайлан болон өмнөх ажиллагааны талаарх бүртгэлийг цаашдын осол, зөрчлийг шинжлэн шалгах үйл ажиллагаанд хэрэглэх боломжтойгоор аюулгүй байдлыг хангаж хадгалах;
- 3/ бүртгэл, тайланг хамгийн сүүлд өөрчлөлт оруулснаас хойш 3 жил хадгалах.

171.69. Байгууламжийн гэмтэл, дутагдал

(а) Өргөдөл гаргагч нь Үйл ажиллагааны заавартаа заагдсан байгууламжид гэмтэл, дутагдал гарсан тохиолдолд энэ талаар бүртгэл хөтлөх, гэмтлийг тогтоох, арилгах шуурхай ажиллагааг зохицуулах, онцгой нөхцөлд ажиллах журмыг боловсруулж мөрдөх

ба энэ журамд гэмтэл, дутагдлын шалтгааныг арилгах, дахин давтан гарахаас урьдчилан сэргийлж, залруулах арга хэмжээг хэрэгжүүлэх ажиллагааг тусгасан байна.

171.71. Бүртгэл/ Records

(а) Өргөдөл гаргагч нь Үйл ажиллагааны заавартаа заагдсан байгууламжийн аюулгүй ажиллагаа, Агаарын навигацийн үйлчилгээний найдвартай хангалтанд шаардлагатай бүртгэлийг хөтлөх, ангилах, цуглуулах, индексжүүлэх, хадгалах, устгах үйл ажиллагааны журмыг боловсруулж мөрдөх ба энэ журмаар дараах бүртгэлүүдийг хөтлөх үйл ажиллагааг зохицуулна:

- 1/ байгууламжийн ажиллагааны талаар баримтжуулсан бичиг баримтын бүртгэл;
- 2/ энэ дүрмийн 171.59-р зүйлд заасны дагуу байгууламж бүрийн хугацаат хэмжилт ба шалгалт тохируулга, хэмжилтийн гүйцэтгэл болон өөрчлөлтийн бүртгэл;
- 3/ энэ дүрмийн 171.63-р зүйлд заасан байгууламжийн үндсэн өгөгдлүүдийг шалгах шалгалт тохируулга, хэмжилтийн төхөөрөмжийн байршил, техник үйлчилгээ болон тохируулгын талаарх мэдээллийг агуулсан бүртгэл;
- 4/ энэ дүрмийн 171.67(а)-д заасан байгууламжид гарсан гэмтэл, дутагдлын байдал, илрүүлсэн болон засаж залруулсан тухай, шинжлэн шалгасан дүн зэргийг агуулсан бүртгэл;
- 5/ энэ дүрмийн 171.73-р зүйлд заасан дотоод үзлэг, шалгалтын бүртгэл;
- 6/ энэ дүрмийн 171.51(б)-д заасан байгууламжийг ажиллуулах этгээдийн дадлага туршлага, мэргэшил, сургалт, ур чадвар, түүнд олгогдсон эрхийн талаарх нарийвчилсан мэдээллийг тусгасан бүртгэл.

(б) Энэ зүйлийн (а)-д заасан бүртгэлүүдийг цэвэр гаргацтай, албан хэргийн тогтсон хэлбэрээр хөтлөх ба тэдгээрийг 3-аас доошгүй жилийн хугацаагаар хадгална.

171.73. Чанарын баталгаажуулалт

(а) Өргөдөл гаргагч нь энэ дүрмээр тогтоосон журам, хөтөлбөрүүд нь үйл ажиллагаанд нийцэж байгаа эсэх, тэдгээрийг хэрхэн дагаж мөрдөж байгааг бататгах, хяналт тавих чанарын баталгаажуулалтын тогтолцоог заавал тогтоосон байна.

(б) Чанарын баталгаажуулалтын тогтолцооны үйл ажиллагаанд дараах хөтөлбөр, журмуудыг боловсруулж мөрдөнө:

- 1/ системийн дотор гарч буй дутагдлыг илрүүлэх, тэдгээрийн бодит шалтгааныг тодорхойлох, ажилтнуудын болон үйлчлүүлэгчдийн мэдээлэл, гэмтэл саатал болон дутагдлын тухай илтгэлийг багтаасан Чанарын үзүүлэлтүүдийг бататгах журам;
- 2/ системийн дотор гарсан аливаа дутагдлыг арилгахад чиглэсэн Залруулах арга хэмжээний журам. Энэ журамд дараах зүйлийг тусгана:
 - 2.1 илэрсэн дутагдлыг хэрхэн засч залруулах;
 - 2.2 үр дүнтэй байлгах үүднээс уг арга хэмжээг хэрхэн хэрэгжүүлэх;
- 3/ системийн дотор аливаа дутагдал гарах, гарсан дутагдлын бодит шалтгааныг тогтоож, давтахгүй байхыг баталгаажуулсан Сэргийлэх арга хэмжээний журам. Энэ журамд дараах зүйлийг тусгана:
 - 3.1 болзошгүй дутагдлаас урьдчилан сэргийлэх;
 - 3.2 үр дүнтэй байлгах үүднээс уг арга хэмжээг хэрхэн хэрэгжүүлэх;
 - 3.3 сэргийлэх арга хэмжээний үр дүнд энэхүү дүрмээр тогтоосон аливаа журамд нэмэлт, өөрчлөлт оруулах.

4/ өргөдөл гаргагчийн Үйл ажиллагааны зааварт дурдсан журмууд хэрхэн хэрэгжиж буйг хянах Дотоод үзлэг, шалгалтын хөтөлбөр. Энэ хөтөлбөрт дараах зүйлийг тусгана:

- 4.1. хийгдвэл зохих үзлэг, шалгалтын шинж чанарыг харгалзан шалгалт явуулах байршил, давтамжийг тогтоох;
- 4.2. шалгалтын үйл ажиллагааг хариуцсан энэ дүрмийн 171.51.(а).2-т заасан этгээдийн сүүлийн хяналт шалгалтаас хойш хэрэгжүүлсэн сэргийлэх, эсхүл залруулах арга хэмжээний үр дүнг;
- 4.3. шалгалтын явцад илэрсэн дутагдлыг арилгах, эсхүл сэргийлэх талаар шалгалтын үйл ажиллагааг хариуцсан 171.51.(а).2-т заасан этгээдийн авах арга хэмжээг;
- 4.4. сэргийлэх, эсхүл залруулах арга хэмжээний дүнг эргэн хянах тухай.

(в) Чанарын баталгаажуулалт хариуцсан этгээд нь Чанарын удирдлагын тогтолцооны мэдлэг, чадварыг эзэмшсэн байх бөгөөд Чанарын аудиторын эрхтэй байна.

(г) Чанарын баталгаажуулалт хариуцсан ажилтан нь байгууламжийн ажиллагаа, аюулгүй ажиллагаа, чанарын хяналттай холбоотой аливаа асуудлаар байгууллагын удирдах албан тушаалтнуудтай шууд харьцах эрхтэй байна.

171.75. Холбооны журам

(а) Өргөдөл гаргагч нь Үйл ажиллагааны заавартаа заагдсан байгууламжуудын ашиглалтын журам, зааврууд нь Чикагогийн конвенцийн Хавсралт 10-ын II-р ботид тодорхойлсон холбооны холбогдох журмуудад заасан шаардлагадтай нийцэж байгааг бататгасан байна.

171.77. Аюулгүй ажиллагааны удирдлагын систем

(а) Өргөдөл гаргагч нь аюулгүй, найдвартай хангахад чиглэгдсэн аюулгүй ажиллагааны удирдлагын системийн бодлого, журмуудыг Гэрчилгээний дагуу зөвшөөрөгдөх агаарын навигацийн үйлчилгээний төрлүүдээр боловсруулсан байна.

(б) Аюулгүй ажиллагааны удирдлагын системийн бодлого, журмуудад дараах мэдээллүүдийг заавал тусгасан байна. Үүнд:

- 1/ өргөдөл гаргагчийн аюулгүй ажиллагааны бодлого, зорилтууд;
- 2/ байгууллага болон ажилтнуудын аюулгүй ажиллагаанд хамааралтай хариуцлагууд;
- 3/ үйлчилгээнд хамааралтай аюулгүй ажиллагааны төвшингүүдийг тогтоосон байх бөгөөд аюулгүй ажиллагааны хүрсэн төвшинг хянах систем;
- 4/ аюулгүй ажиллагааны дотоод үзлэг шалгалтын үйл ажиллагаа;
- 5/ аюулгүй ажиллагаанд хамааралтай дотоод удирдлагын болон мэдээлэх үйл ажиллагаа;
- 6/ үйлчилгээнд байгаа болон болзошгүй аюул, эрсдлийг тодорхойлох, үнэлэх, хянах ба арга хэмжээ авах үйл ажиллагаа;
- 7/ дотоод нэгжүүдийн болон хамтран ажилладаг бусад алба, салбаруудтай аюулгүй ажиллагааны удирдлагын талаар харилцан ажиллах холбоосыг тодорхойлсон;
- 8/ үзүүлж байгаа үйлчилгээндээ өөрчлөлтийг хийх үеийн удирдлагын үйл ажиллагаа.

(в) Өргөдөл гаргагч нь өөрийн аюулгүй ажиллагааны удирдлагын системийг хяналтандаа байлгах бөгөөд түүнийг зөв ажиллаж байгааг бататгах үүднээс шаардлага гарвал өөрчлөлтийг хийнэ.

171.79. Үйл ажиллагааны зааварт тавигдах шаардлага

(а) Өргөдөл гаргагч нь дараах мэдээллийг агуулсан Үйл ажиллагааны зааврыг ИНЕГ-ын даргад ирүүлнэ:

- 1/ Энэ дүрмийн 171.51.(а) 1/ болон 2/-т заасан албан тушаалтнуудын нэрс, албан тушаал;
- 2/ 171.51.(а) 2/-т заасан албан ажилтнуудын үүрэг хариуцлагын тодорхойлолт;
- 3/ 171.51.(а) 2/-т заасан албан ажилтнуудын харилцан ажиллагааг ажлын байр бүрээр харуулсан бүтэц, зохион байгуулалтын бүдүүвч;
- 4/ Агаарын навигацийн үйлчилгээний техникийн байгууллагын гэрчилгээнд заасан үйлчилгээг үзүүлэх байгууламж тус бүрийн маяг, байршлын жагсаалт;
- 5/ Ажлын байр тус бүрт ашиглагдах байгууламжийг хариуцан ажиллуулахаар бэлтгэгдсэн ажилтнуудын бүрэлдэхүүн, тэдгээрийн ажлын байрны тодорхойлолт;
- 6/ Энэхүү дүрмээр тогтоосон шаардлагыг хангаж байгууллагын үйл ажиллагааг зохицуулах дараах журмууд:
 - 6.1. ажилтнуудын мэргэжлийн ур чадварыг үнэлэх, хадгалах, дээшлүүлэх, мэргэжлийн үнэмлэх олгох журам;
 - 6.2. байгууламжийг суурилуулах ба ажилд хүлээн авах журам;
 - 6.3. туршилт, шалгалтаар байгууламжийг түр ажиллуулах журам;
 - 6.4. байгууламжийн сэлбэг хангалтын журам
 - 6.5. аюулгүй байдлын хөтөлбөр;
 - 6.6. бичиг баримтыг хөтлөх журам;
 - 6.7. хугацаат хэмжилт ба шалгалт тохируулга гүйцэтгэх журам;
 - 6.8. байгууламжийн ажиллагааны журам;
 - 6.9. шалгалт тохиргоо, хэмжилтийн төхөөрөмжийн ашиглалтын журам;
 - 6.10. байгууламжийн мэдээллийг зарлах журам;
 - 6.11. осол, зөрчлийн дараа байгууламжийн шалгалт хийх журам;
 - 6.12. байгууламжийн гэмтэл, дутагдлыг илрүүлэх, түүнийг арилгах журам;
 - 6.13. бүртгэлийн журам;
 - 6.14. чанарын баталгаажуулалтын журам;
 - 6.15. холбооны журам;
 - 6.16. аюулгүй ажиллагааны удирдлагын систем;
 - 6.17. байгууллагын өдөр тутмын үйл ажиллагаанд мөрдөгддөг бусад журмууд;

7/ Үйл ажиллагааны зааврыг түгээх, нэмэлт өөрчлөлт оруулах, хяналт тавих журам.

(б) Энэ дүрмийн 171.51.(а) 1/-д заасан удирдах албан тушаалтан нь дүрмийн шаардлагыг хангах аргачлалыг тодорхойлж, Үйл ажиллагааны зааврыг үйл ажиллагаандаа байнга мөрдөх баталгааг өргөдөл гаргагчийн нэрийн өмнөөс гаргасан байна.

(в) Өргөдөл гаргагчийн Үйл ажиллагааны заавар нь энэ дүрмийн шаардлагыг хангахгүй бол ИНЕГ-ын дарга нь Агаарын навигацийн үйлчилгээний техникийн байгууллагын гэрчилгээг олгохгүй.

В БҮЛЭГ. ҮЙЛ АЖИЛЛАГААНД ТАВИГДАХ ШААРДЛАГУУД**171.101. Гэрчилгээ эзэмшигчийн хүлээх үүрэг**

Гэрчилгээ эзэмшигч нь:

(а) Үйл ажиллагааны зааврынхаа хүчин төгөлдөр хувийг байгууллагын хэсэг тасаг бүрт байлгана;

(б) Үйл ажиллагааны заавартаа тусгагдсан бүх журмуудыг дагаж мөрдөнө;

(в) Ажил үүргээ гүйцэтгэхэд нь шаардлагатай Үйл ажиллагааны зааврын холбогдох заалтуудыг боловсруулж, ажилтнуудад түгээнэ;

(г) Энэ дүрмийн Б бүлэгт заасан стандарт, шаардлагуудыг мөрдөж ажиллана;

(д) Байгууллагын нэр, хаяг, утас факсын дугаар өөрчлөгдөх тохиолдолд 14 хоногийн дотор ИНЕГ-ын даргад бичгээр мэдэгдэнэ.

171.103. Таних тэмдэг ба радио дуудлага

(а) Өргөдөл гаргагч нь таних тэмдэг болон радио дуудлагыг авахдаа ИНЕГ-аас гаргасан ИНЕГ-171/02 маягыг бөглөж, ИНЕГ-ын даргад ирүүлнэ.

(б) ИНЕГ-ын дарга нь таних тэмдэг болон радио дуудлагыг иргэний нисэхийн аюулгүй ажиллагаанд сөрөг нөлөөтэй биш гэж үзсэн тохиолдолд олгоно.

171.105. Техникийн ашиглалтын болон үйлчилгээний зааварчилгаа

(а) Гэрчилгээ эзэмшигч нь Үйл ажиллагааны заавартаа заагдсан байгууламж бүрийн ашиглалтын болон засвар, үйлчилгээний нарийвчилсан зааварчилгааг боловсруулж мөрдөнө.

(б) Байгууламжийг хариуцан ажиллуулах инженер техникийн ажилтныг ашиглалтын болон техник үйлчилгээний зааварчилгаар хангасан байна.

(в) Энэ зүйлийн (а)-д заасан зааварчилгад дараах зүйлийг тусгасан байна:

- 1/ байгууламж бүрийн ашиглалтын үндсэн параметрууд;
- 2/ энэ зүйлийн (в) 1/-д заасан ашиглалтын үндсэн параметруудын хамгийн доод түвшин;
- 3/ энэ зүйлийн (в) 1/-д заасан параметруудыг хэмжихэд шаардагдах хэмжилт, шалгалтын төхөөрөмж;
- 4/ тухайн байгууламжийг ашиглалтанд оруулах үед заавал гүйцэтгэх шалгалт тохиргоо болон хэмжилтийн үйл ажиллагаа;
- 5/ тухайн байгууламжийн ашиглалтын болон техник үйлчилгээний үед заавал гүйцэтгэх шалгалт тохиргоо болон хэмжилтийн үйл ажиллагаа.

171.107. Дүрмийн шаардлагаас гажих

(а) Гэрчилгээ эзэмшигч нь нислэг үйлдэж байгаа агаарын хөлөг, зорчигчдын амь нас, эд хөрөнгийг хамгаалах шуурхай арга хэмжээ авах шаардлага тулгарсан тохиолдолд энэ дүрмийн аливаа шаардлагаас энэ дүрмийн 171.109 (а)-д заасан хүрээнд гажиж болно.

(б) Энэ зүйлийн (а)-д зааснаар Гэрчилгээ эзэмшигч нь дүрмээс гажсан тохиолдолд дараах арга хэмжээг авна:

- 1/ ИНЕГ-ын даргад дүрмийн шаардлагаас гажиж, шуурхай арга хэмжээг авсан тухай тайланг 14 хоногийн дотор бичгээр гаргана.

2/ Энэ зүйлийн (б) 1-д заасан тайланд дүрмийн шаардлагаас гажих шалтгаан, үргэлжилсэн хугацаа, сунгалт зэргийг нарийвчлан тайлбарласан байна.

171.109. Үйл ажиллагааны хязгаарлалт

(а) Гэрчилгээ эзэмшигч нь энэ дүрмийн 171.53 (в)-д заасан журмын дагуу туршилт, шалгалт гүйцэтгэхээр байгууламжийг түр ажиллуулахаас бусад тохиолдолд ашиглагдаж байгаа байгууламжийн ажиллагаанд нөлөө үзүүлж болзошгүй өөр байгууламж ажиллуулахыг хориглоно.

(б) Гэрчилгээ эзэмшигч нь эрх бүхий байгууллагаас зөвшөөрөл олгогдоогүй радио нэвтрүүлэх байгууламжийг агаарын навигацгийн радио давтамж дээр ажиллуулахыг хориглоно.

(в) Гэрчилгээ эзэмшигч нь энэ дүрмийн 171.107 (а)-д заасан дүрмийн шаардлагаас гажих шаардлага тулгарсан, эсхүл энэ дүрмийн 171.53 (в)-д заасан журмын дагуу туршилт, шалгалт гүйцэтгэхээр байгууламжийг түр ажиллуулахаас бусад тохиолдолд дараах шаардлагыг хангаагүй аливаа байгууламжийг ажиллуулахыг хориглоно:

- 1/ байгууламжийг гэрчилгээ эзэмшигчийн Үйл ажиллагааны зааварт заасан байх;
- 2/ байгууламжийн ажиллагааны энэ дүрмийн 171.65-д заасан журмын дагуу холбогдох мэдээллийг хэвлэсэн байх;
- 3/ байгууламжийн ажиллагаа нь энэ дүрмийн 171.53 (а)-д заасан шаардлагад нийцэж байх;
- 4/ байгууламжийн удирдлага, хяналтын систем бүрэн ажиллагаатай байх;
- 5/ байгууламжийн хугацаат хэмжилт ба шалгалт тохируулга, энэ дүрмийн 171.59 (б)-д заасан хөтөлбөрийн дагуу хийгдсэн байх;
- 6/ Хэрэв байгууламжийн ажиллагаанд саад учруулах, эвдлэн сүйтгэх үйл ажиллагаа нь Иргэний нисэхийн аюулгүй ажиллагаанд аюул учруулахаар бол байгууламжийг энэ дүрмийн 171.55 (а)-д заасан гэрчилгээ эзэмшигчийн аюулгүй байдлын хөтөлбөрт тусгасан байх.

171.111. Гэрчилгээ эзэмшигч байгууллагад өөрчлөлт хийгдэх

(а) Гэрчилгээ эзэмшигч нь дараах шаардлагыг хангасан байна:

- 1/ Гэрчилгээ эзэмшигч нь Үйл ажиллагааны зааварт оруулах нэмэлт, өөрчлөлтүүд энэ дүрмийн шаардлагыг хангаж байгааг бататгана;
- 2/ Гэрчилгээ эзэмшигч нь Үйл ажиллагааны заавартаа оруулах нэмэлт өөрчлөлтийн хуулбарыг түүнийг хүчин төгөлдөр мөрдөгдөж эхлэхээс 14-өөс доошгүй хоногийн өмнө ИНЕГ-ын даргад ирүүлсэн байна;
- 3/ Иргэний нисэхийн аюулгүй ажиллагааг хангах зорилгоор ИНЕГ-ын даргын зүгээс санал гаргавал гэрчилгээ эзэмшигч нь Үйл ажиллагааны заавартаа өөрчлөлт оруулна.

(б) Гэрчилгээ эзэмшигч нь байгууллагадаа дараах өөрчлөлтийг хийх тохиолдолд ИНЕГ-ын даргаас зөвшөөрөл авна:

- 1/ энэ дүрмийн 171.51.(а) 1-д заасан удирдах албан тушаалтныг өөрчлөх;
- 2/ энэ дүрмийн 171.51.(а) 2-т заасан албан ажилтнуудыг өөрчлөх;
- 3/ гэрчилгээнд заагдсан эрхийн дагуу ашиглагдаж буй байгууламжийн төрлийг өөрчлөх;
- 4/ аюулгүй байдлын хөтөлбөрийг өөрчлөх;
- 5/ байгууллагын аюулгүй ажиллагааны удирдлагын системийн бодлого, журмуудад өөрчлөлт оруулах.

(в) Энэ зүйлийн (б)-д заасан өөрчлөлт нь Иргэний нисэхийн аюулгүй ажиллагаанд хамааралтай гэж үзсэн тохиолдолд ИНЕГ-ын дарга тодорхой нөхцөл зааж болно;

(г) Гэрчилгээ эзэмшигч нь энэ зүйлийн (в)-д заасан ИНЕГ-ын даргын тодорхойлсон нөхцлийг дагаж мөрдөнө.

(д) Хэрэв энэ зүйлийн (б)-д заасан өөрчлөлтийг хийснээр Агаарын навигацийн үйлчилгээний техникийн байгууллагын гэрчилгээнд нэмэлт, өөрчлөлт оруулах шаардлагатай бол гэрчилгээ эзэмшигч нь ИНЕГ-ын даргад гэрчилгээг нэн даруй ирүүлнэ.

(е) Гэрчилгээ эзэмшигч нь Үйл ажиллагааны заавар, эрхлэх үйлчилгээний болон байгууламжийн жагсаалтад цаг үеийн шаардлагад нийцүүлэн өөрчлөлт, шинэчлэлт хийх үүрэгтэй.
